

四明叢書

張宗祥



馮侍郎

遺書

四明張氏釣園開雕

序

秦虎狼也申包胥欲復楚往乞師依庭牆而哭日夜不絕秦伯哀之卒出師而楚以復壽鏞曰楚不爲秦滅者倖耳包胥之哭可功可罪者也當明清絕續之交在日本未覆幕以前寬永享國三十餘年母后承之其子復辟改元義明承平日久畏言兵革非有遑於中國也馮侍郎京第效申包胥故事往乞師撒斯瑪王聞長崎王之拒也曰中國喪亂我不能援而使其臣哭於吾境不亦恥乎議發各島罪人以應夫各島罪人豈足以救明

之亡而卒區區者不吾畀其幸我喪亂之心古今一也
侯朝宗曰君子當寂寞荒涼之際情不自禁吾知侍郎
之所處儻所謂情不自禁者乎雖然侍郎固血性男子
也自其曾祖莊軒先生受業王文成之門講學以靜坐
養心爲旨諸父都御史元颺兵部尙書元颺世稱大小
馮者東林之巨子也侍郎內承諸父之教出則師事戴
山漳浦二先生退與復社諸名士上下其議論節義講
於平昔恢復矢諸悃忱中興十二論今雖未見其文而
當日慷慨其詞直陳殿陛冰霜凜凜其氣象猶恍惚也

之矣壽鏞曩取檀几叢書中簞溪自課讀書錄二書讀之已深識其爲人及觀族裔孟顓所編遺書復錄諸家所作事狀益見其志之大才之奇境之困遇之艱侘僚仰天拔劍斫案一隅山寨隻手支撐雖冒萬戮而無所怨者也嗚呼國不自立而乞鄰以拯之固忠臣義士無可如何之舉而豈其有濟哉民國二十二年九月後學張壽鏞序

馮侍郎遺書序

明兵部侍郎慈谿馮公輔監國寺山砦嘗乞師日本不獲歸而爲建夷所醢其遺文不傳其墓在馬公橋歲久亦漸湮民國興其族孫貞羣以事之墓所得同時舉兵者董給事中墓求導者更蹤迹之而侍郎所葬在焉已又從諸書錄其遺文得蘭易蘭史鞠小正序及雜文三首詩如干首蓋未能幾什一也明之末孝安思文宅東南皆支一歲獨永曆帝保其巖阻延祚至十餘年監國魯王之棲翁洲視南京閩都益傾蕩矣然視前者猶少

久則曩有生之心而今期於必死也方侍郎東乞師也固逆計無必成理然明季數當爲是自建夷初叛勢裁如米粒黑子經略熊公已嘗欲結韃靼以掣之及永曆蒙塵於緬晉王又用暹羅之師侍郎所期亦猶是令三者一有就事之成敗未可知也然卒不獲其效以敗身亦與俱死致命遂志侍郎蓋與晉王同視經略之死於吏者爲得所矣國亡百餘年漢人喑噫無敢道其事者獨全紹衣數稱述之及乎諸夏廓清建夷革面距侍郎歿時幾三百載卒能得其筆著與其神之宅斯蓋皇漢

種族之靈所馮非一人之事也貞羣旣集其文復錄諸
家所作事狀以附於篇亂世之文以譎奇見志與承平
異宜讀其書者不得以義法繩也民國十三年五月章
炳麟序

馮侍郎遺書目次

敘錄

蘭易卷上

蘭易卷下

蘭史

簞溪自課

讀書燈

三山吟

馮侍郎遺書敘錄

全祖望馮侍郎遺書序

馮侍郎簞溪集已不傳而其所爲蘭易二卷蘭史一卷
鞠小正一卷自課一卷真至會約一卷先贈公書庫中
有之或曰侍郎中興十二論尙有存者而求之未得乃
鈔得姚江黃氏所作墓志吾鄉董戶部次公所作簞溪
始末皆并入焉蘭易以十二辟卦爲經故附之以十二
月令而又有十二翼爲傳託言受之鹿亭田父其言蘭
草今生大紅以南者皆非屈騷所樹所紉然如漢高奮

跡徒步系統三代天下所君則卽真矣何偽之有必將
求所謂九畹十畝者而種之皆反古之僂民也其言之
憤而怪如此蘭史先之以九品之表有本紀有世家有
列傳有外紀有外傳以爲使非蘭而擬於蘭者隸於蘭
焉其言又與蘭易相反鞠小正託言陶公所著謂陶公
以秋九月爲正卽不奉宋正之微旨黃者魏統之色也
晉所受代子滅則思母故宋運當用魏德勝之抑薊之
爲言窮也華事至此而窮則其言更誕而無徵嗚呼屈
宋之悲鬱亦嘗荒唐其詞以自抒寫而侍郎之寄意則

幾入於無何有之鄉而出之亦已過矣自課一卷國難
前所定讀書之程也真至會約一卷則其諸父都御史
所爲而侍郎定其約者也附以上吳尙書箋則己丑所
作也先贈公題其下曰此其晚年手定之稿及覆審別
本果稍異焉侍郎之被戮也黃氏墓志以爲別將王昇
來降請導軍以往侍郎以病不能行在灌頂山中昇竟
得之高氏雪交亭集亦同而云不久王昇亦伏誅獨董
氏所記謂出於麾下陳甲旣降復歸侍郎推心不疑遂
爲內應被執於仗錫之三官寺予參考舊聞則墓志是

也嗚呼以侍郎之梗命聖朝不得不戮之以警多方而要之亦諒其心故降將卒遭丁公之誅侍郎有知其亦可以瞑目矣鄭後學全祖望序

劉城三山吟序

世不乏文人也文人而敦行植節卓然拔萃者十不得一二爾有行節矣內蘊王霸之略外挺將相之姿真堪救時濟物出爲世用者百不得一二爾逮吾友馮躋仲始兼之矣躋仲所著作古文詩詞制舉業無不才奇學正遙集千代獨步一時陳同甫所云文巾龍虎也至其

秉道嫉邪淵渟嶽立蓋與其鄉之司空劉先生家之少
參太僕兩先生同車合軌兢兢乎廉恥禮讓之閑焉客
歲余與躋仲並在北都值胡入犯烽火達甘泉余憂默
無能吐一語躋仲口畫戰守兵食機宜指示勝敗得失
情形一如百戰宿將老謀祕算使用其言便可請纓磨
盾痛飲黃龍焉者惜當路莫能知也躋仲亦遂閉門不
通貴客謂余曰咄嗟此非布衣說劍時耳已遂與余後
先出都逐隊諸生試復淪落此爲躋仲命不蚤遇邪抑
斯人斯世未得遽平治也昔人有自擬管樂者有秀才

時身任天下者今以視躋仲定復何如此寧獨一文人
與一節行之士而已哉三山吟爲秋試被放徜徉京口
時作躋仲笥珍輒矜慎不肯示人臘盡余遇之南都探
囊見詩音節氣體開元大曆而下無所受之以此稱文
人不遂當第一邪然其中欣慨交心古今紛會有歌有
泣可觀可興皆見之乎詩鐵甕城如斗大三山片石爾
經其歎詠卽似乍得一古人擁膝高嘯其間山川與爲
不朽者矣因強其付梓以便徧授躋仲有同里執友陸
文虎萬履安董天鑑劉瑞當黃太沖昆季皆躋仲所許

一輩人知予有言不爲阿好者也池陽社盟弟劉城伯
宗拜題於南都靈谷寺齋

柴夢楫三山吟後序

嗚呼此我邑馮忠隱公之詩也公生有異才於書無不
讀特慕古奇士非常之行年十三補邑博士弟子員試
輒高等二十五從其從父留仙先生備兵南都都人士
請爲選函雅兵餘二房墨家絃誦也又刻其所評隲史
漢二書嗣乃從撫軍天津值邊警公爲授略行間而兵
大捷者再從父爲疏其功賜之進士以臺省用公勿受